

PEMBERITAHUAN PERTANYAAN BUKAN LISAN DEWAN RAKYAT

PERTANYAAN : BUKAN LISAN

**DARIPADA : DATO' SERI HAJI MUKHRIZ BIN TUN
DR. MAHATHIR [JERLUN]**

SOALAN NO. 316

Minta **MENTERI KESIHATAN** menyatakan dasar Kerajaan berhubung cadangan pengharaman ketum.

JAWAPAN

Yang di-Pertua,

Alkaloid *mitragynine* yang didapati di dalam daun kratom (ketum) telah disenaraikan sebagai bahan psikotropik di bawah Jadual Ketiga, Akta Racun 1952 [Akta 366] semenjak tahun 2003 dan terdapat kawalan khas ke atas aktiviti pengimportan, penjualan, pembekalan, pemilikan dan penggunaannya di bawah Peraturan-peraturan Racun (Bahan-bahan Psikotropik) 1989.

Walaupun Akta 366 memperuntukkan kawalan ke atas *mitragynine*, namun ia tidak merangkumi kawalan ke atas penanaman pokok ketum. Sehubungan itu, Kementerian Kesihatan Malaysia (KKM) dalam proses meminda Akta 366 bagi merangkumi kawalan ke atas tumbuhan psikoaktif seperti pokok ketum. Pindaan ini akan memperuntukkan larangan ke atas aktiviti perladangan, penanaman, pengimportan, pengeksportan, pembekalan, penjualan dan pemilikan tumbuhan psikoaktif seperti pokok ketum. Larangan berkaitan pengambilan ketum juga akan diperuntukkan untuk mengekang penyalahgunaannya. Peruntukan hukuman yang lebih deteren bagi kesalahan-kesalahan berkaitan ketum juga akan diperuntukkan. Cadangan kawalan ini adalah untuk membendung masalah penggunaan ketum yang mempunyai banyak kesan negatif kepada masyarakat dan negara.

NO SOALAN : 316

Peruntukan kawalan ke atas penanaman ketum yang dicadangkan bukanlah bersifat larangan mutlak. Penanaman boleh dipertimbangkan untuk tujuan tertentu seperti tujuan penyelidikan dan perubatan. Peraturan-peraturan berkaitan penanaman ketum akan diwujudkan bagi memastikan terdapat kawalan yang jelas bagi mengelakkan penyalahgunaannya. Rasional dalam membenarkan penanaman ketum untuk tujuan tertentu ini adalah bagi membolehkan kajian yang lebih mendalam ke atas potensi ketum dalam bidang perubatan dapat dijalankan dengan teratur. Sekiranya didapati kesan mudaratnya melebihi daripada faedah perubatan, penanaman ketum mungkin boleh dilarang sepenuhnya.

Pada masa kini, Kerajaan tidak berhasrat untuk menyenaraikan ketum atau alkaloidnya ke dalam Akta Dadah Berbahaya 1952. Sekian, terima kasih.